

ՓԱՍՏԱՔԱՆԱԿԱՆ ԴՊՐՈՑՈՒՄ ԼՍԱՐԱՆ Է ԱՆՎԱՆԱԿՈՉՎԵԼ ՓԱՍՏԱՔԱՆ ՏԻԳՐԱՆ ՏԵՐ-ԵՍԱՅԱՆԻ ԱՆՎԱՄԲ

17.07.2017 17:53

Հուլիսի 17-ին ՀՀ փաստաբանների պալատում կազմակերպվել էր Փաստաբանների միջազգային միության նախագահ Տիգրան Տեր Եսայանի մահվան տարելիցին նվիրված հիշատակի միջոցառում: Միջոցառումն իրականացել է Տեր-Եսայանի ընտանիքի անմիջական մասնակցությամբ: Նրա անվամբ է անվանակոչվել ՀՀ փաստաբանական դպրոցի երեք լսարաններից մեկը: Հիշատակի միջոցառումը սկսվել է մեկ րոպե լուռությամբ: Բացման խոսքով հանդես է եկել ՀՀ փաստաբանների պալատի նախագահ Արա Զոհրաբյանը՝ համառոտ ներկայացնելով Տիգրան Տեր-Եսայանի կենսագրությունն ու անցած ուղին: Փաստաբանների պալատի նախագահը, բնութագրելով Տիգրան Տեր Եսայանին, նշել է որ նա պրոֆեսիոնալ էր, համարձակ և լավ մարդ: Անդրադառնալով լսարանի անվանակոչմանը՝ Արա Զոհրաբյանը նշել է, որ այդ քայլով նպատակ է դրվում, որ ապագա սերունդները ճանաչեն Տիգրան Տեր-Եսայանին և ընդհանրապես փաստաբանության զարգացման պատմությունն իմանան: Պալատի Մեծ դահլիճում ցուցադրվել է Ա1 պլուս հեռուստաընկերության կողմից պատրաստված հիշատակի ֆիլմը, որտեղ ներկայացված է Տիգրան Տեր-Եսայանի մասնագիտական, մարդկային կերպարը: Ֆիլմում հարցազրույցների տեսքով ընկերները, մտերիմները, գործընկերները նրան հիշում են որպես ընկերասեր, մարդու իրավունքները օրենքից վեր դասող և չափազանց հումորով մարդու: Հիշատակի ֆիլմից հետո նրա մասին խոսել են Երևան քաղաքի ավագանու անդամ, փաստաբան Զարուհի Փոստանջյանը և իրավապաշտպան Ավետիք Իշխանյանը: Փոստանջյանի հուշերում Տեր-Եսայանը պատկերվել է որպես ժողովրդավարական արժեքների ներդրման համար մարտնչող կերպար, ինչպես նաև նոր սերունդներին համարձակություն ներշնչող, կազմակերպչական բարձր ունակություններ դրսևորող ղեկավար և ավագ ընկեր, ումից կարելի էր մշտապես նոր բան սովորել: Ավետիք Իշխանյանը նշել է, որ Տեր-Եսայանն անփոխարինելի ընկեր էր և բացառիկ մարդ: Տիգրան Տեր-Եսայանի մարդկային և մասնագիտական հատկանիշներին է անդրադարձել նաև փաստաբան Միշա Փիլիպոսյանն, ով ժամանակին եղել է ՀՀ փաստաբանների միության նախագահ: Նա ներկայացրել է Անկախ Հայաստանում փաստաբանական համայնքի ձևավորմանն առնչվող որոշ հարցեր, մասնավորապես՝ տարբեր միությունների ստեղծման, Տիգրան Տեր-Եսայանի ջանքերով դրանց միավորման կարևորությանը վերաբերող դրվագներ: Միջոցառման մասնակիցները ներկա են եղել նաև ՀՀ Փաստաբանական դպրոցում Տիգրան Տեր-Եսայանի անվան լսարանի բացման հանդիսավոր արարողությանը, որը ուղեկցվել է փաստաբան Ալինա Ենգոյանի՝ Կոմիտասյան քառյակների կատարմամբ:

Տեղեկանք

Փաստաբան Տիգրան Տեր-Եսայան

23.04.1963թ. – հուլիս 2016թ.

Փաստաբան Տիգրան Տեր-Եսայանը ծնվել է 23.04.1963 թվականին, Երևան քաղաքում:

Տիգրան Տեր-Եսայանը 1999 թվականի մարտից զբաղվել է փաստաբանական գործունեությամբ:


1999 թվականին Հայաստանում տեղի ունեցած դատաիրավական բարեփոխումների արդյունքում հիսուն փաստաբանների կողմից Տիգրան Տեր-Եսայանի նախաձեռնությամբ հիմնադրվել է Հայ փաստաբանների միջազգային միությունը:

Հայաստանում փաստաբանական ինստիտուտի հզորացման նպատակով Հայ փաստաբանների միջազգային միությունը 2002 թվականի մարտին միացել է Փաստաբանների միջազգային միությանը, իսկ Տիգրան Տեր-Եսայանն ընդհանուր ժողովի որոշմամբ ընտրվել է Փաստաբանների միջազգային միության նախագահ:


2005 թվականի հոկտեմբերին Փաստաբանների միջազգային միության և Հայաստանի Հանրապետության փաստաբանների միության միաձուլման արդյունքում ստեղծվել է Հայաստանի Հանրապետության փաստաբանների պալատը՝ որպես փաստաբանների անկախ և ինքնակառավարվող մասնագիտական միասնական կառույց:

Տիգրան Տեր-Եսայանն անգնահատելի դերակատարում է ունեցել Հայաստանում փաստաբանության զարգացման հարցում: Նա հանդիսանում է Հայաստանում ազատ, անկախ և համարձակ մտածողություն ունեցող փաստաբանի կերպարը կերտողներից մեկը: Տիգրան Տեր-Եսայանը՝ լինելով նաև երիտասարդության ջատագով, դեռևս 1999 թվականին համախմբել է երիտասարդ փաստաբաններին, աջակցելով նրանց մասնագիտական դաշտում ինտեգրվելու գործընթացում: Տիգրան Տեր-Եսայանը նաև նյութական աջակցություն է ցուցաբերել Հայաստանի փաստաբանությանը, մասնավորապես՝ տարիներ շարունակ անհատույց օգտագործման պայմանով Հայ փաստաբանների միջազգային միությանն ապահովել է հագեցած վարչական շենքով, ինչպես նաև նյութատեխնիկական միջոցներով:

Փաստաբան Տիգրան Տեր-Եսայանը մահացել է 2016 թվականի հուլիսին:










ՀՀ ՓԱՍՏԱՐԱՆԵՐԻ ՊԱՍՏԻՄԱՆՈՒԹՅԱՆ ԿԱՄԱՐԻ ՓՈՒՍՏԱՐԱՆԻ ՊՐԵՍ ՍԵՐՎԻՍ
PRESS SERVICE OF CHAMBER OF ADVOCATES OF RA



ՀՀ ՓԱՍՏԱՐԱՆԵՐԻ ՊԱՍՏԻՄԱՆՈՒԹՅԱՆ ԿԱՄԱՐԻ ՓՈՒՍՏԱՐԱՆԻ ՊՐԵՍ ՍԵՐՎԻՍ
PRESS SERVICE OF CHAMBER OF ADVOCATES OF RA



```
Վերադառնալ $(window).load(function(){ if(typeof $(".fb_comments_count").html() != "undefined" &&
parseInt($(".fb_comments_count").html()) != 0){ updateCommentsCount(window.location.href); } })
```